

# **PRAVILNIK O PRECIZIRANJU DOKAZA O ISPUNJAVANJU USLOVA ZA STICANJE DRŽAVLJANSTVA BOSNE I HERCEGOVINE NATURALIZACIJOM I OLAKŠANOM NATURALIZACIJOM**

("Službeni glasnik Bosne i Hercegovine", br. 7/2014)

## **Član 1**

(Predmet Pravilnika)

Pravilnikom o preciziranju dokaza o ispunjavanju uslova za sticanje državljanstva Bosne i Hercegovine naturalizacijom i olakšanom naturalizacijom (u daljem tekstu: Pravilnik), propisuje se pribavljanje dokaza po službenoj dužnosti, preciziraju se dokazi o poznavanju jezika i pisma, dokazi o nekažnjavanju i nevođenju krivičnog postupka, dokazi o izmirenju poreskih i drugih finansijskih obaveza, dokazi o obezbjeđivanju izvora prihoda i pribavljanje dokaza za olakšanu naturalizaciju izbjeglica i apatrida.

## **Član 2**

(Pribavljanje dokaza po službenoj dužnosti)

Dokazi da stranac ne predstavlja prijetnje po bezbjednost BiH, da ima odobren stalni ili privremeni boravak na teritoriji BiH i da strancu nije izrečena mjera protjerivanja iz zemlje ili zaštitna mjera udaljavanja stranca sa teritorije BiH, pribavljaju se po službenoj dužnosti od nadležnog organa (Obavještajno bezbjednosna agencija, Služba za strance).

## **Član 3**

(Dokazivanje poznavanja pisma i jezika)

Dovoljno poznavanje pisma i jezika jednog od konstitutivnih naroda BiH u postupku sticanja državljanstva BiH dokazuje se:

- a) potvrdom o položenom ispitu iz poznavanja pisma i jezika jednog od konstitutivnih naroda u BiH na fakultetu, srednjoškolskoj ustanovi ili ustanovi za obrazovanje odraslih koje su ovlašćene od strane ministarstva nadležnog za obrazovanje da izvode programe iz službenih jezika BiH;
- b) svjedočanstvom o završenom osnovnom, srednjem ili visokom obrazovanju u BiH;
- c) svjedočanstvom inostrane obrazovne ustanove kojim se potvrđuje da je obrazovanje provedeno po programu na jednom od jezika u službenoj upotrebi u BiH ili svjedočanstvom o završenom kursu najmanje B1 stepena znanja jednog od tih jezika.
- d) Državljanima Republike Srbije, Republike Hrvatske i Crne Gore, u postupku sticanja državljanstva BiH, ne pribavljaju dokaze iz stava 1. ovog člana.

## Član 4

(Dokazi o nekažnjavanju i o nevođenju krivičnog postupka)

Dokazi o neosuđivanju (nekažnjavanju) i o nevođenju krivičnog postupka u smislu odredaba člana 9. stav 1. tač. 5. i 7. Zakona, pribavljaju se u zemlji porijekla.

## Član 5

(Dokaz o izmirenju poreskih i drugih finansijskih obaveza)

Dokaz da je izmirio sve poreske ili druge finansijske obaveze, stranac obezbjeđuje kod nadležnog poreskog ili drugog nadležnog organa u zemlji porijekla i u BiH.

## Član 6

(Dokaz o obezbjeđenju izvora prihoda)

Dokaz da ima obezbjeđen stalni izvor prihoda u iznosu koji omogućava egzistenciju ili da je u stanju da obezbijedi pouzdan dokaz o finansijskim izvorima za sopstveno izdržavanje, stranac obezbjeđuje potvrdom o radnom odnosu na neodređeno vrijeme i visini plate, ili dokazom o visini penzije, ili dokazom o drugim stalnim izvorima prihoda.

## Član 7

(Pribavljanje dokaza u BiH od strane izbjeglica i apatrida)

(1) Stranac koji je podnio zahtjev za sticanje državljanstva BiH, u smislu odredaba člana 11a. (izbjeglice i apatridi), dokaze iz člana 9. tač. 5. i 7. Zakona, pribavlja kod nadležnog organa u BiH i nema obavezu da ih pribavlja u inostranstvu (dokazi da nije osuđivan duže od tri godine u periodu od osam godina prije podnošenja zahtjeva i da se protiv njega ne vodi krivični postupak).

(2) Rješenje o protjerivanju stranaca iz zemlje ili zaštitna mjera udaljavanja stranaca sa teritorije BiH, koje je izdato strancu iz stava (1), prije priznavanja izbjegličkog statusa ili privremenog boravka iz humanitarnih razloga za lice bez državljanstva, neće uticati na njegovu naturalizaciju.

## Član 8

(Stupanje na snagu i objavljivanje Pravilnika)

Ovaj pravilnik stupa na snagu prvog narednog dana od dana objavljivanja u "Službenom glasniku BiH".